

REGLUR

um störf og verksvið skólanefndar Garðyrkjuskóla ríkisins á Reykjum í Ölfusi.

1. gr.

Meginhlutverk Garðyrkjuskóla ríkisins er að efla íslenska garðyrkju og styrkja samkeppnisstöðu hennar. Þetta hlutverk rækir skólinn með sérhæfðri fræðslu á sviði garðyrkju og tengdra greina, endurmenntun fyrir þá sem við garðyrkju starfa, útgáfu fræðslurita og námskeiðum fyrir almenning. Ennfremur með því að skapa aðstöðu á skólastaðnum fyrir rannsóknir, tilraunir, leiðbeiningar og aðra faglega og félagslega starfsemi í þágu garðyrkjunnar.

2. gr.

Landbúnaðarráðherra hefur á hendi yfirstjórn Garðyrkjuskóla ríkisins ásamt þriggja manna skólanefnd, er hann skipar til þess. Í skólanefnd eiga sæti þrír menn skipaðir án tilnefningar. Einn fulltrúi tilnefndur af kennurum skólans og einn fulltrúi tilnefndur af nemendafélagi skólans skulu hafa seturétt á fundum skólanefndar með málfrelsi og tillögurétt þegar fjallað er um mál er snerta námsefni, kennslutilhögun og dvöl nemenda á skólastaðnum. Rétt er nefndinni að kalla til aðra starfsmenn skólans þegar fjallað er um mál er snerta þeirra verksvið. Skólastjóri situr fundi skólanefndar með málfrelsi og tillögurétt.

3. gr.

Skólanefnd skal hlutast til um að starfsaðstaða nemenda og kennara sé svo sem best verður á kosið. Skólanefnd skal fylgjast með að góður starfsandi ríki á skólastaðnum, að skólastarfið sé í samræmi við markmið skólans og að í skólastarfinu og í samskiptum aðila á skólastaðnum sé farið að settum reglum. Skal hún hlutast til um úrbætur ef út af er brugðið. Beri slíkt ekki árangur skal nefndin þegar tilkynna það landbúnaðarráðuneytinu.

4. gr.

Skólanefnd mótar stefnu skólans og áherslur í starfi. Hún gerir ásamt skólastjóra tillögu að námsskrá að fengnum tillögum fræðslunefnda, sbr. 28. gr. reglugerðar fyrir Garðyrkjuskóla ríkisins á Reykjum í Ölfusi nr. 712 30. desember 1996, hefur á hendi skipulagsmál á skólastaðnum, forgangsraðar framkvæmdum í samráði við skólastjóra og hefur yfirumsjón með þeim. Skólanefnd gerir í samvinnu við skólastjóra starfs- og fjárhagsáætlun fyrir skólann til þriggja ára í senn og skal hún endurskoðuð árlega. Nefndin fjallar um fjárhagsáætlun er skólastjóri gerir árlega í samræmi við niðurstöður fjárlaga. Skólanefnd ákveður ásamt skólastjóra upphæð innritunargjalda er nemendum er gert að greiða við innritun í námsáfangi, svo og efnisgjöld og pappírsgjöld.

5. gr.

Skólanefnd gerir tillögu til landbúnaðarráðherra um skipan skólastjóra og fjallar um umsóknir um stöður kennara, sem skólastjóri ræður. Skólanefnd skipar fræðslunefndir að fengnum tilnefningum skv. 28. gr. reglugerðar nr. 712/1996 og gerir í samráði við skólastjóra tillögur að námsskrá skv. 22. gr. reglugerðarinnar, að fengnum tillögum fræðslunefnda.

Einnig skipar hún endurmenntunarnefndir, sbr. 29. gr. sömu reglugerðar og tekur ákvarðanir um skipulag endurmenntunarstarfsins í samráði við skólastjóra.

6. gr.

Skólanefnd hefur á hendi skipulagsmál á skólastaðnum, þ.m.t. ráðstöfun húsnæðis á skólastaðnum fyrir einstaka þætti í starfi skólans og annarra aðila. Nefndin ákveður í samráði við skólastjóra hvaða húsnæði og aðra aðstöðu á skólastaðnum Garðyrkjuskóla ríkisins leggur

til vegna rannsókna og tilrauna, sbr. 20. gr. reglugerðarinnar. Skólanefnd er heimilt, að fengnu samþykki landbúnaðarráðherra, að gera samkomulag við Bændasamtök Íslands um að garðyrkjuráðunautar samtakanna fái starfsaðstöðu við skólann. Þá er skólanefnd heimilt, að fengnu samþykki landbúnaðarráðherra, að gera samkomulag við Samband garðyrkjubænda og önnur félagasamtök garðyrkjunnar um að þau fái aðstöðu fyrir starfsemi sína á skólastaðnum.

Skólanefnd ákveður áherslur í rannsóknum og tilraunum, að fengnum tillögum fagráðs í garðyrkju og skólastjóra, í samráði við fagdeildarstjóra einstakra námsbrauta. Að höfðu samráði við skólastjóra og Rannsóknastofnun landbúnaðarins ræður skólanefnd tilraunastjóra er stýrir tilraunastarfinu og hefur umsjón með daglegri framkvæmd þess.

7. gr.

Halda skal gerðarbók um fundi skólanefndar og skal senda skólaráði og landbúnaðarráðuneytinu afrit fundargerða nema þegar um trúnaðarmál er að ræða. Fundargerðir skólanefndar skulu liggja frammi í skólanum.

8. gr.

Skólanefnd skal hafa náð samráð við landbúnaðarráðuneytið um störf sín og stefnumörkun í málefnum skólans.

Reglur þessar eru settar samkvæmt heimild í lögum nr. 91/1936 um Garðyrkjuskóla ríkisins, sbr. reglugerð nr. 712 30. desember 1996 fyrir Garðyrkjuskóla ríkisins á Reykjum í Ölfusi og öðlast þegar gildi.

Landbúnaðarráðuneytinu, 4. apríl 1997.

Guðmundur Bjarnason.

Guðmundur Sigþórsson.

REGLUGERÐ

**um breytingu á reglugerð nr. 27, 27. janúar 1997
um úthlutun veiðiheimilda í úthafskarfa á Reykjaneshrygg.**

1. gr.

3. málslíður 5. gr. reglugerðar nr. 27/1997, sbr. reglugerð nr. 134, 17. febrúar 1997, orðist svo: Verðmætastuðull fyrir úthafskarfa er 0.54, sbr. 10. gr. reglugerðar nr. 362, 27. júní 1996, um veiðar í atvinnuskyni fiskveiðiárið 1996/1997.

2. gr.

Reglugerð þessi er sett samkvæmt ákvæðum laga nr. 151, 17. desember 1996, um fiskveiðar utan lögsögu Íslands, til þess að öðlast þegar gildi.

Sjávarútvegsráðuneytinu, 11. apríl 1997.

Þorsteinn Pálsson.

Jón B. Jónasson.